

Palabranan di entreguismo: "Mientras cu ami ta Ministro di Husticia, ningun hende ta worde extradita"

ORANJESTAD(AAN) Ta ken na Aruba ainda por tuma ministranan di AVP pa hende serio y hende drechi, despues cu nan a entrega tur loke por a ser entrega na Hulanda?

Ta ken por tuma ministranan di AVP na serio, si awe nan ta bisa cu nan ta defende cu alma y cuerpo interesnan di Aruba y su pueblo y cu ningun otro gobierno ageno por bin dicta mientras cu nan ta na mando y den e mesun rosea nan ta dal pais Aruba puñal den lomba cu ley di extradicion?

Esaki ta loke Watty Vos hunto cu Henny Eman y cu Mito Croes manera nan marioneta den banda, a haci for di momento cu nan a drenta den gobernacion pasobra ta tras di otro nan a tuma pueblo haci y traiciona tur loke por a ser traiciona y entrega na poderman ageno.

E discusion di extradicion por ta grandi y sigur por tin diferencia di opinion, pero na momento cu un ministro di Husticia bay bisa cu boca grandi publicamente cu mientras cu e como ministro Husticia ta na mando y mientras cu NAN ta na mando, ningun hende por worde ex-

tradita sin mas!!

Esaki ta loke Watty Vos a haci no mucho tempo pasa y ta pakico e y Henny Eman a bay haci declaracionnan cu nan no por a cumpli cune?

Ta pakico nan a sinta gaña pueblo publicamente y cu un cara determinante den conferencia di prensa di gobierno, pa despues lo contrario sali como e berdad pasobra Watty Vos mes tabata tin un KB riba su cabez debi cu Hulanda no tabata confia Watty Vos como Ministro di Husticia y combina cu e entreguismo di Henny Eman cu Mito Croes den banda, nan a sinta haci tur contrario di loke nan a bisa pueblo.

Extradicion a bira un hecho mirando tur loke Henny y su marionetanan a haci pa caba di entrega Aruba na Hulanda, pero por lo menos Henny, Watty y Mito por a bringa pa garantianan solido pa esnan cu mester worde extradita, pero te hasta esaki nan a entrega na Hulanda.

Watty, Henny y Mito Croes a bisa cu cos no ta bay manera cu hopi hende tabata kere y cu mester bin un Ley di Reino

promete riba extradicion, pero tempo a pasa y unda e Ley di Reino cu Watty y consorcio a papia di dje a keda?

Hof di Antiyas y Aruba a conseha pa bin garantianan pa esnan cu ta worde extradita y Hulanda a djis hala esaki un banda, mescos cu Watty, Mito y Henny a haci cu nan entreguismo di marca mayor y esaki ta e resultado di tres aña y mey di gobernacion di AVP y su hendenan.

Tur cos a bay den scondi y ta un KB (mocion di desconfianza di parti di Reino contra Aruba) tabata bay skeiro tras di otro y ta cu e hendenan aki atrobe Glenbert ta bay sinta forma gobierno, pa despues pueblo bolbe bin tende cu Gembie no tabata sa y cu Gembie no a ser poni na altura?

Partido OLA por bay sinta goberna atrobe cu entreguistanan manera Henny, Watty y Mito Croes pa asina participa den mas entreguismo?

AVP no tabata kier e zakenkabinet di MEP pasobra nan ta bay forma nan mesun "Kabinet di Saco", pasobra nan lo bay sigui bende Aruba manera bende "Saco cu cangreu y tur".

Gobernador a coregi peticion pa cu extradicion

ORANJESTAD(AAN) Segun informacionnan cu DIARIO, a haya ayera den transcurso di dia, oficina di Gobernador a haci cambianan drastico den e peticion pa cu extradicion di primonan Mansur.

Merca tabata tin poni den e peticion di extradicion, cu na Aruba primonan Mansur a viola ley door di trece y saca placa di Aruba, siendo cu esaki na Aruba no tabata castigable y riba dje e sumanan di placa cu tabata drenta Aruba tabata ser denuncia na autoridadnan competente, sin cu esaki tabata un obligacion legal pa esnan cu tabata drenta sali cu placa.

Ainda pueblo por corda e listanan cu nombenan di comerciantenan na Aruba cu tabata bin y sali cu placa cu comerciantenan mes tabata

denuncia na aeropuerto y ta e listanan aki a ser uza den temporada di Martin Ras pa asina difama hopi comerciante na Aruba, pa despues Merca a hinca e argumentonan aki den nan peticion di extradicion.

Gobernador a coregi esaki den e peticion y bisa cu primonan Mansur no por worde extradita pa esaki y tambe cu Hof no a dedica tempo na e punto esencial y importante aki.

Bo no por bay acusa un hende di algo cu no ta castigable na Aruba y ta di con Gobernador si a cay riba e punto aki y Hof mes no a wak esaki o no a traha riba esaki?

Cu e cambio grandi aki e peticion di extradicion ta haya un otro buelta pasobra e argumentonan cu Gobernador a schrap no por worde uza mas na Merca.

Gobierno a bolbe inverti 7 miyon den Air Aruba

ORANJESTAD(AAN) -- Ayera Conscho di Minister a dicidi di inverti atrobe 7 miyon florin den Air Aruba. E motibonan pa sigui inverti den Air Aruba ta pasobra gobierno ta sigui kere den e posibilidad pa haci e compania rendabel atrobe. Fin di siman pasa Air Aruba a bolbe pidi gobierno 6 miyon pa cubri e gastonan urgente. Dialuna ministernan Eman, Glenbert Croes, Armand Engelbrecht y Tico Croes a bolbe reuni cu e directiva di

Air Aruba y e grupo di trabao instala pa Parlamento.

Promer Minister Eman a duna di conoco: "e compania aki ta masha importante pa nos economia pa turismo en particular y pa henter nos economia. Ponc acerca e motivacion halto cu tin den e personal di e compania aki bo ta compronde ta pakico nos ta haci tanto pa salba e compania. E ta duna nos tur motivo pa sigui busca un solucion.

Tres mula Spaño dilanti di Juez Comisario ayera



ORANJESTAD (AAN): Ayeramaña a presenta dilanti di Huez Comisario tres mula cu ta sera actualmente.

Aki ta trata di tres mula cu kier a sali pa Europa cu droga y nan nacionalidad ta Spaño.

Via Hulanda nan ta trata di drenta Spaña cu droga ya cu asina cu nan yega Hulanda e resto di e caminda por bay cu auto tambe.

E droga a ser haya den nan maleta y manera ta custumber

semper esaki ta ser haya cu maleta cu bom falso.

Mirando con cos ta bay na aeropuerto por bisa cu e aña aki sigur lo kibra record pa loke ta droga haya na aeropuerto y tambe mulanan

gara na aeropuerto unda e Spañonan sigur ta hibando e ventaha awor aki sigui pa e Hulandesnan.

Den e caso aki e tres Spañonan nan detencionnan a keda prolonga caminda

pronto nan ta na caminda pa K.I.A.

Riba e fotonan por mira ora cu e tres mulanan ta subi auto despues di a caba di sali for di edificio di corte.

